

Hawgeq Dahih: Henmaenh Gij Gaeuqgeq Satrieng


大圩古镇——坚守最后的古老

□ Anh Yuzsanh ingj



▲ Ndw n gyae yawj hawgeq, ranz baizleq ndaetndiq.

◀ Bouqgeq daengjndwn song henz gai.



▲ Ndonj gvaq dougungj daengz diuz gaigeq wnq.

Menhmenh youq gwnzgai benjrin hawgeq Dahih byaij, ndaej yawjraen gij bouqdiemq gaeuqgeq song henz gai lij louzce ndaej ndeindiq, dingzlai aeu faex benj doqdaep guhbaenz caemhcaiq gaenq bienqbaenz saek ndingndaem, loh ok gij yiengh gaeuqgeq siliengz geij bak bi cwkomz haenx; gwnz ciengzsingz, aendiengz, luengqhongh miz gogaue danghbin rimrwd heuswd, saek seiz lij dingqnyi gij dingding dangdang sing canghdiet dizdub huqdiet haenx daj goxgai laeglwd haenx cienz okdaeuj, caiq miz lengq aen bouqdajsan, bouqhaiznyangj, bouqywdoj nem bouqfeigyauej gaeuq sieng youq henz gai, hawj vunzraeuz mumjgyumq yawj ok gij hwnghoengh nauhyied gaxgonq de.

Hawgeq Dahih youq ndaw gyaic Yienh Lingzconh, dep haenzdah baihdong Dahlizgyangh, liz gyanghaw Gveilinz 18 goengleix gyae. Dahih roenraemx roenhawq doengrat, engq dwg diegcomzsanq aenhaw gaicawx okmingz ndeu, baihdong miz diuzdah moq Cauzdenz, caeuq Dahmax Fuzli doxciap; baihsae swnj Dahsiengsw, doeng daengz Yungifuz; baihbaek miz Dahlizgyangh conlae gvaq Gveilinz, Hingh'anh, Yangzsoz, Bingzloz, Vuzcouh, duenh gwnz doeng daengz Huznanz, duenh laj doeng daengz Gvangjcouh, youq seizgeiz Ciuhbwzsong couh hwnghoengh hwnjdaej, ndawde suenq "hawhaeux Dahih" cei okmingz.

Hawgeq Dahih daj Ciuhbwzsong conienz hainduj hwnjguh, daengz Ciuhmingz Ciuhcingh hwnghoengh, seiz Minzgoz cei hoenghvuengh, daengz seizneix gaenq miz baenz cien bi lizsij, caeux youq 600 lai bi gaxgonq, Dahih couh baiz youq Guengjsae raeuz seiq aen hawhung (Hawluz Binhayang, Hawyungz

Canghvuz, Hawgiuz Gveiyen) ndawde aen cei hung. Mwh Ciuhmingz Ciuhcingh, gwnzhaw hangzbouq gak cungj gak yiengh, gak dieg canghseng'ei youq gizneix laebbaenz veigvanj, ndawde Guengjdoeng, Huznanz, Gyanghsih veigvanj nem Cinghcinhsw haemq okmingz. Daengz Minzgoz cogeiz, Dahih gaenq miz bet diuz gai hung, gij mingzhauh bouqdiemq miz "seiq aen hung", "bet aen rauh", "ngeihcib seiq aen iq", yienh'ok gij yiengh hoenghvuengh seizhaenx.

Hawgeq lizsij gyaenanz, giuzrin gungj dog Giuzfanhgyaeu youq Ciuhcingh guhbaenz haenx, lij maenhcoek dwk hamjgaq daengz baihnanz diuzdah; gwnzhaw miz Miuhaucouj, Miuhanvangz caeuq gij veigvanj Guengjdoeng, Huznanz, Gyanghsih Ciuhcingh hwnjguh haenx, diuz gaibenjrin raez baenz 5 goengleix haenx, gij ranzlaeuz cienheu vaxheu, gij bouqdiemq benjfaex haenx, cungj ndaej guhcingq gij gaeuqgeq aenhaw. Seiqhenz Dahih lij miz Byagoengsix, Byagingjsanh, Byabuenzmuh, baenz bi seiqgeiq faex mwn raemhrwd; Mauzcouh baihsae hawgeq, raemxdah hophumx seiq mienh, gingjsaek gyaundeiz; diegneix lij dwg aen

suenmak hung ndaem miz makgam, makdoengj, makbugdiengz ndeu, doenghnaz suenmak, gyaundeiz lumj veh.

Hawgeq lij miz gij rizdin bouxokmingz, Sunh Cunghsanh daiq bing hoenx bae baihbaek seiz, naengh ruz doenggvaq Dahih caemqcaiq youq henz dah guh yienjgangj gvaq; Lingzconh aen Cunghgung cujcz cei caeux de—Cunghgung Gveilinz Dunghyangh Gih Veijyenzvei caeuq Cunghgung Mauzcunh Cihbu couhdwz bi 1928 ndwen 8 youq Dahih laebbaenz. Denyingj "Liuz Cejsam" caemh youq gizneix goepingj haujai gingjrog, miz cibgeij bouh denyingj, densigi youq gizneix goep gingjrog gvaq. Lijmiz, gyoengqvunz gwnzhaw gigwn miz daegsaek de caeuq gij vwnzva, yizloz, sibgvenq fungsug ndawbiengz lai cungj lai yiengh, caemh hawj bouxhek haenggyaez cix doxcaeh bae youzcet.

Youq ndaw hawgeq menhmenh youzbyaij, mwngz ndaej roxnyinh gij cwxcaih soengset saedcej vunz gwnzhaw, caemdingh caemhcaiq angqyangz, gyoengqde cungj caez henmaenh faenh cienzgeiz gaeuqgeq satrieng neix……



▲ Cietduenngux caemh angq guh ruzlungz doxdax.



▲ Gwnz gai hawgeq ngoenzgoenz nauhyiea raeuh.



▲ Dousingz maenhdwat hensouj hawgeq.



▲ Huqdoj hawgeq gai ndaej bieng.



▲ Gaibenjrin iet doeng bae seiqlengq.



▲ Giuzfanhgyaeu lwnhgangj lizsij hawgeq.